



partii naleraq

Nuuk 25. oktober 2018  
UKA2018/166  
Hans Enoksen Partii Naleraq

**2020 nallertinnagu ullukinnerup ulloq 21. decembarip pisortatigoortumik nalliussineqartalernissaanik atulersitsinissaq pillugu Inatsisartuni aalajangiiffigisassatut siunnersuut.**

(Inatsisartuni ilaasortaq Peter Olsen, Inuit Ataqatigiit)

Inatsisartunut ilaasortaq Peter Olsen Inuit Ataqatigiit inatsisartunut aalajangiiffigisassamik siunnersuuteqarpoq tassalu 2020 nallertinnagu ullukinnerup 21.december pisortatigoortumik nalliussineqartalernissaanik siunnersuuteqarluni tamannalu Partii Naleqqamiit oqaaseqarfigissavarput.

Ukiuni kingullerni malunnartumik inuiaat kalaallit siulitta inuunermi pingaartitaannik pingaartitsinerit saqqummiartuinnartut assut tarnikkut timikkullu nukittorsaataasut malunnarsiartuinnarmata ullutsinni tamatta qularinngilara nukittorsaatigalugillu nuannaarutigisarigut.

Inuiaat kalaallit nunami issittorsuarmi pinngortitamilu peqqarniisinnaasumi najugaqarpugut, inuiaat allat takkuttarsimagaluartut sapilerlutik nunguttarsimasut oqaluttuarineqartarpoq. Uagut massakut siuligut taakkuusimapput pinngortitami peqqarniitsumi inuunissaminnut naleqqusarsimasut sapinngitsullu, kinguariit pinngortitami saperatik ataannarsinnaasut pilersisimavaat allanik nallerneqarsinnaanngitsut. Taamaattumik allat inuuniarfigissallugu sapigaanni kinguaariit kalaallit siulitsinnik nunarsuarmik nallerneqarsinnaanngitsumik tunineqarsimanerput nukittorsaatigalugu puigornagulu tarnikkut qujassutigiuartariaqarparput.

Ukiup taarnertusinerpaaffiani ullukkinneriortarnerput pisortatigoortumik nalliussineqartarnissaanik siunnersuuteqartup Peter Olsen-ip saqqummiussaa Partii Naleqqamiit tamakkiisumik tapersorsornerippat oqaatigissavarput. Tassanilu inuiaqatigiit kinaassuserput tunngavigalugu nalliuttorsornerit unnussiuarnerit isiginnaartitsinerit erinarsornerit nipilersornerit qilaatersornerit allarpasuillu ingerlanneqartarsinnaapput.

Taamatut oqaaseqarluta siunnersuuteqartup Peter Olsen Inuit Ataqatigiit saqqummiussaa taperserparput.